

Сарпинск райо̀на теегӓр

Сарпинск райо̀на колхозмудин болн совхозмудин теегӓр—тӓрӓ хадлгӓна гӱргӱ болдж йовна. Тӓрӓнӓ ургъцан геелт угагъар хурадж, государствд бӱудӓ ӱгӱгӓнӓ зурагъан болзгаснӱ урд кӱцӓхин тӱлӓ совхозин болн МТС-н кӱдлмшчнр, колхозникуд цуг аргъ-чидлӓн ӱгч бӓӓнӓ. Тӓрӓ хуралгӓна кӱдлмш бӱрднӱгӱ кевӓр Ильичин нертӓ болн „Путь к коммунизму“ гидг колхозмудар кегддӓнӓ. Эн колхозмудар намрар тӓргдсн 2 мингъ гар гектар тӓрӓн хурагдв. Совхозмуддундас „Степной“ совхоз райо̀нд тӱрӱн нӱр эздж йовна. Эн совхоз райо̀нд тӱрӱн болдж тӓрӓнӓ хуралгӓнд орад, 1300 гектар газрт буудӓн культур хурадж авб.

Райо̀на икнӱк эдл-ахусар техник ашта сӓӓнӓр олзлгдна. Чапаевин нертӓ болн „Степной“ совхозмудин, дакад „Путь Ленина“ гидг колхозин теегӓр делгӓд хаддг лафетн машид ӱдр-сӱ уга гишнӱ кӱдлдж йовна.

—Кӱдлмшин зурад, тӓрӓ хурадж авлгӓнг кӱдлмшин 15-н ӱдрин эргцд дуусхар темдлгдлӓ, —гидж „Степной“ совхозин бригадир ӱр Зинченко

келнӓ. Кӱдлмшин тӱрӱн йовудар хӓлӓхлӓ, бидн тӓрӓ хурадж авлгӓна эрки кӱдлмшӓн темдлгсн цагасн зӱвӓр эртӓр чилӓхвдн.

Механизатормудин сӓн кӱдлмшин ашд Садовск МТС-н Гриценкон, Донсковин, Быстороповойин бригадсар тӓрӓ хуралгъар темдлгдсн болзгуд ахрддж йовна. Комбайнермуд болн трактористнр ӱдр ирвӓс кӱдлмшин ашан улм ӱддлӱлӓд йовна. С. В. Быстороповойин бригад сӱл хойр ӱдрин эргцд зурагъар хӓлӓгдснӓс 86 гектар тӓрӓ икӓр хурадж авб.

2-ч номертӓ совхозин тӓрӓ тӓрӓчнр ӱдр болгӓн шунмгӓа сӓӓнӓр кӱдлдж йовна. ӱнӱнд кӱдлмшин зурагъан эс кӱцӓдг нег чигн комбайнер болн тракторист уга. Цуг кӱдлмшчнр, тӓрӓ хадлгӓна болзгинь хасх, нег чигн буудӓ гел уга ургъцан ахулдж авх сӓн седклтӓ, шунлтта кевӓр кӱдлдж йовна. Гардачнӱ ӱр Шарманов бӓӓдг 3-ч номертӓ фермд тӓрӓ хадлгӓн тус йилгӓн сӓӓнӓр кегддӓнӓ. Трактористнр А. Рыжов болн В. Шарманов тӓрӓ хуралгӓна агрегатсан зогсал уга йовулдж, кӱдлмшин кемдӓгӓн давулдж сӓн чинртӓгъӓр кӱцӓнӓ. Гурвдгч фермин

теегӓр 320 гектар тӓрӓн хадгддж одв.

Садовск МТС-н гардврт ордг колхозмудас „Гигант“ гидг колхоз тӓрӓ-темс тӓрлгӓнӓ хамгин ик эдл-аху гидж тоолгдна. Энӱнӓ хурадж авх тӓрӓнӓ газрин агӱунь—14 мингъ гар гектар. Механизатормудта хамдан кӱдлдж йовх колхозникуд тӓрӓд ургъасн ургъцан тӱргн кевӓр хаддж йовна. Дундлад нег ӱдр болгӓн 600—700 гектар тӓрӓн хадгдна. Гурвдгч полеводческ бригадин бригадир Василий Павлович Бысторопов иигдж келнӓ:

—Тӓрӓ хурадж авлгӓна кӱдлмшт йовх цуг колхозникуд, Советск йосна 40 джилин ӱбнд нерӓдсн социалистическ дӱрлдӓнд орлцдж бӓӓнӓ. Теегин кӱч-кӱлсчнр эн ончта сӓн ӱбниг производственн ик диилврмӱдӓр тосхар зӱтгдӓцхӓнӓ. Тӓрӓ хадлгӓн темдлгсн зурагъасн хойр-гурвн ӱдр эртӓр дуусхар седдӓнӓвдн.

Тӓрӓ хадлгӓн дахулдж буудӓгӓннӱ цокад соломинь болн половинь хурадж, скирдс тӓвдж йовна. Шуд токмуд деерӓс шин ургъцин буудӓ государствд ӱгднӓ.

А. ПАВЛОВ.